

Bakolose 1:9 – Mokanda na Bomoi

[9] Yango wana, biso mpe banda mokolo oyo toyokaki yango, tozali kotika te kosambela mpo na bino mpe kosenga Nzambe ete atondisa bino na boyebi ya mokano na Ye, kati na bwanya nyonso mpe mayele ya Molimo.

Eyano

Bavesi oyo elakisi posa makasi oyo ntoma Paulo azalaki na yango mpo na basantu ya lingomba ya Bakolose, ete batonda na boyebi ya mokano ya Nzambe, kati na bwanya nyonso mpe mayele ya Molimo.

Ayebaki ete mpo lingomba ekoka kosepelisa Nzambe mpe kotelema malamu, esengeli eyeba mokano ya Nzambe mobimba. Yango wana ezalaki posa na ye banda kala ete batonda na boyebi ya mokano wana.

Mokano ya Nzambe ezali nini?

Ezali na biteni mibale (2) ya mokano ya Nzambe:

1) Mokano ya seko

2) Mokano ya tango

Mokano ya seko

Mokano ya seko ezali oyo ezalaka tango nyonso mpe mpo na bato nyonso; moto nyonso oyo andimi asengeli akokisa yango.

Ndakisa:

- bosantu (1 Batesalonika 4:3),
- kosakola Sango Malamu,
- kozala na bolingo,
- kosangana elongo,
- kokoba na losambo,
- kosambela mpe kokumisa Nzambe.

Mokano ya tango

Mokano ya tango ezali oyo Nzambe alingi osala kaka na tango moko boye; ezalaka na lisolo moko, ezalaka te mpo na tango nyonso.

Ndakisa: lelo Nzambe akoki kolinga te osakola, kasi akinda yo otala mwana moko ya yatima na mboka moko. To lokola Filipino, oyo Molimo alobaki na ye atika bato mingi mpe akende na esobe

mpo na moto moko ya Etiopi (Misala ya Bantoma 8:26).

Tango mosusu mpe okoki koleka na komekama moko, mpe ozali koyeba te ete ezali kelasi ya Nzambe mpo na kokokisa mokano moko. Na esika oyoka yango, okomi kaka kopamela mpe kobunda na yango. Yango wana, tango Nkolo Yesu asambelaki ete bakangola ye kopo ya pasi, asilisaki na koloba: “Tata, mokano na Yo nde ekokisama.”

Makambo wana nyonso esengaka bwanya mpe boyebi mpo na koyeba yango mpe kokokisa yango. Ezali mpasi koyeba yango na mayele ya moto to kokokisa yango na makasi ya moto.

Kasi motuna ezali: moto akoki kozwa ndenge nini boyebi ya mokano ya Nzambe?

1) Na nzela ya losambo

Eloko ya liboso Paulo alobi ezali losambo. Asambelaki mpo na basantu ya Bakolose mpo ayebaki ete nzela ya kozwa boyebi wana ezali losambo.

Yakobo 1:5 – Mokanda na Bomoi

[5] Soki moto kati na bino azangi bwanya, asenga na Nzambe, oyo apesaka bato nyonso na boboto mpe apamelaka moto te; mpe akopesama.

Losambo efungolaka porte mpo Nzambe akota kosala na bomoi na biso mpe kotia biso kati na mokano na Ye mobimba. Nzambe asalaka kati na biso na nzela ya losambo. Soki losambo ezali te, ekoki kosalema te ete moto atambola kati na mokano nyonso ya Nzambe.

2) Liloba ya Nzambe

Na kotanga Liloba ya Nzambe, nde moto ayebaka ezaleli ya Nzambe: nini alingaka mpe nini ayinaka. Mongongo ya Nzambe, mitindo na Ye ya polele oyo esengaka te kolimbolama lisusu, ezali Biblia Mosantu.

Nzembo 119:105 – Mokanda na Bomoi

*[105] Liloba na Yo ezali mwinda ya matambe na ngai, mpe
pole ya nzela na ngai.*

Moto oyo amitiyaka na momeseno ya kotanga Biblia, azalaka mpasi te ete akwea to abima libanda ya plan ya Nzambe, mpo Liloba wana etikala kati na ye lokola mafuta oyo eteyaka ye mpe etambolisaka ye.

3) Batoli mpe batindami ya Bokristo

Nkolo amonisaka mokano na Ye tango tozali kosangana elongo mpo na kokanisa Liloba na Ye. Alobaki ete epai bato mibale to misato basangani na Kombo na Ye, Ye azali wana kati na bango.

Bato mibale oyo bazalaki kokende Emausi, tomonaki ete bazalaki koleka moko te; mpe tango bazalaki kosolola likambo ya Kristo, Yesu akutanaki na bango ata bayebaki Ye te, abandaki koteya bango, mpe na suka bayebaki mokano ya Nzambe mobimba

(Luka 24).

Yango wana tosengeli te kokima lingomba, mpo kuna
tosanganaka na biteni mingi ya Nzoto ya Kristo, mpe tozali
kotongana mpe kopesana biteni. Na suka, mokano ya Nzambe
emonisami epai na biso.

Ata tango motuna monene ebimaki kati na lingomba mpo na bilei
mpe mibeko, bakambi basanganaki na Yerusaleme, basololaki
makasi, mpe na suka Nzambe apesaki polele ete bato báboya
makila mpe kindumba, kasi batika kotiela bato ya bikolo mosusu
kilo ya mibeko oyo ata Bayuda bakokaki te komema yango
(Misala 15).

Yango wana, ezali malamuni kosolola mpe kokabola plan na yo na
bandeko to na lingomba, mpo batoli ya Nzambe oyo etondi na
bwanya ekoki kosalisa yo mingi.

4) Kokesenisa makambo ya Molimo

Oyo ezali likoki oyo Nzambe apesaka moto kolanda motango ya
kokola na ye ya Molimo (Baebre 5:14). Ata soki asengi te to atuni

Nzambe te, moto akoki koyeba oyo ezali ya solo mpe ya lokuta, oyo ezali ya sembo mpe ya mabe, ya Molimo to ya nzoto, oyo etambolami na Nzambe to na makanisi ya bato.

Na boyebi oyo, moto akoki koyeba mokano ya Nzambe, mpo ewutaka na bokómi ya Molimo mpe bokómi ya kati.

Bosukisi

Yango wana, yo mwana ya Nzambe, kanisa malamumu: esengeli mpenza otambola kati na mokano na Ye. Mabe ya kotambola libanda ya mokano yango ezali lokola oyo Nkolo Yesu alobaki na Matai 7:21.

Matai 7:21 - Mokanda na Bomoi

[21] Moto nyonso oyo alobaka na ngai: “Nkolo, Nkolo,” akokota te na Bokonzi ya Likolo, kasi kaka moto oyo asalaka mokano ya Tata na ngai oyo azali na Likolo.

Tosalaka ndenge nini mpo totunda na boyebi ya mokano na
Ye? (Bakolose 1:9)

Nkolo apambola yo.

Kabola mateya oyo ya malamumu na basusu.

Soki olingi lisalisi mpo na kondima Yesu na bomoi na yo ofele,
yebisa biso na banimero oyo ezali na se ya mokanda oyo.

Mpe mpo na kozwa mateya ya mokolo na mokolo na nzela ya
WhatsApp, kota na channel na biso na ko-cliquer lien oyo.

Nkolo apambola yo.

Share on:
WhatsApp